

# **Qaffasinnerusumik ilinniartitaanerit pillugit Inatsisartut inatsisaat**

## **Kapitali 1**

*Atuuuffia*

**§ 1.** Inatsisartut inatsisaat una atuutissaaq qaffasinnerusumik ilinniakkanut neqeroorutigineqartunut, Ilisimatusarfimmit, qitiusumik inuutissarsiutinillu ilinniarfiit aamma ilinniarfinnit allanit neqeroorutaasartunut.

*Imm. 2.* Qaffasinnerusumik ilinniagaq tassaavoq ilinniagaq annerusumik teoretiskiullunilu atuagarsorfiusoq, ilinniarnertuutut soraarummeeqqaarsimanissamik piumasaqaatitaqarfiusoq, tamatumunnga ilanngulligit immikkut aaqqissuussamik ilinniarnertuunngorniarnermik ingerlatsineq imaluunniit inuutissarsiummik ilinniagaqarneq. Qaffasinnerusumik ilinniakkanut ilaapput bacheloritut, kandidatitut-, ph.d.-tut, inuussutissarsiortermut akademimi, diplomitaarniarluni aamma masteritut ilinniakkat, tak. §§ 11-16.

**§ 2.** Naalakkersuisut qaffasinnerusumik ilinniakkanik ataqtigissakkanik aaqqissuussissapput.

## **Kapitali 2**

*Ilinniakkat*

*Neqeroorutit aamma ilinniarfissanik aqtsineq*

**§ 3.** Qaffasinnerusumik ilinniartitsinerit Ilisimatusarfimmit neqeroorutigineqarsinnaapput.

*Imm. 2.* Qitiusumik inuutissarsiutinillu ilinniarfiit aamma ilinniarfiit allat Naalakkersuisunit akuerineqareernermik kingorna ilinniakkanik ingerlaqqiffiusunik neqerooruteqarsinnaapput. Qaffasinnerusumik ilinniakkat, qitiusumik inuutissarsiutinillu ilinniarfiit neqeroorutaat ilinniarfiup ilinniartitsissutigisartagaasa iluanniissapput.

*Imm. 3.* Naalakkersuisut qaffasinnerusumik ilinniakkat neqeroorutigineqartarnerat pillugu malittarisassanik aalajangersaasinnaapput, tamatumunnga ilanngulligit:

- 1) piffissaq tamaat piffissallu ilaani ilinniakkat neqeroorutaanersut,
- 2) ilinniakkat ungasianiiit ilinniartitsinertut neqeroorutaasartut,
- 3) neqeroorutit akuersissutiginissaat akuersissutillu tunuartinneqarsinnaanerat,

- 4) ilinniartitsissutinik ataasiakkaanik neqeroortarneq aamma ilinniartitsissutinut aalajangersimasunut tunngatillugu pikkorissarnerit,
- 5) naammattusaammik immikkullu ilinniartitsinernik ingerlatsinerit, kiisalu
- 6) qaffasinnerusumik ilinniakkat ilaannik nunani allani ingerlatsisinnaaneq.

**§ 4.** Naalakkersuisut qaffasinnerusumik ilinniakkanik neqeroorutit akuerisinnaavaat:

- 1) ilinniagaq assingusoq Kalaallit Nunaanni ilinniarfinni allani neqeroorutigineqanngippat, taamaattoq tak. imm. 2,
- 2) ilinniakkap nunat tamat akornanni pitsaassusissanut pitsaassusissallu qularnaarnissaannut aalajangersagaasut piviusungortissinnaappagit, taamaalillunilu angusat nuuneqarsinnaanerat, ilinniartunik paarlaasseqatigiittooqarsinnaanera aamma nunat tamat akornanni akuerisaaneq anguneqarsinnaallutik.
- 3) suliffeqarnermi politikkikkut, aningasaqarnikkut aamma inuiaqatigiinermi isigniagassanut naleqqiullugu ilinniagaq pisariaqartinneqartutut isigineqarpat.

*Imm. 2.* Naalakkersuisut imm. 1-imi, nr. 1-imi aalajangersakkat sanioqqunneqarnissaat aalajangiussinnaavaat, ilinniakkap Kalaallit Nunaanni ilinniarfinni arlariinni neqeroorutigineqarnissaa pisariaqartinneqarpat, aamma

*Imm. 3.* Naalakkersuisut imm. 1 naapertorlugu akuersissuteqarnissamut atugassarititaasussanik aalajangersaasinnaapput.

**§ 5.** Ilinniarfit qaffasinnerusumik ilinniakkant neqeroorutaasunit, ilinniartitsissutinik ataasiakkaanik aamma ilinniartitsissutinut aalajangersimasunut tunngatillugu pikkorissartitsinernik, Inatsisartut inatsisaat manna naapertorlugu neqeroorutaasunik, neqerooruteqarsinnaapput, taamaallaat ph.d.-tut ilinniagaq pinnagu.

**§ 6.** Ilinniarfit naammattusaammik ilinniartitsinermik ingerlatsinissat, ilinniartunut qaffasinnerusumik ilinniakkami ilinnialersussatut akuerisaasunut, neqeroorutigisinnaavaat, ilinniartut ilinniagassatigut ilinniakkap naammassinissaanut pisariaqartunik tunngavissinnissaat siunertaralugu.

**§ 7.** Ilinniarfiit ilinniartunut bacheloritut imaluunniit kandidatitut ilinniakkami ilinnialersussatut akuerisaasunut piginnaaneqarluartunut, ilassutitut ilinniartitsinernik ingerlatsinerit neqeroorutigisinnaavaat.

**§ 8.** Ilinniarfit nunani allani ilisimatusarfimmik ataatsimik arlalinnilluunniit imaluunniit ingerlatsivinnik allanik qaffasinnerusumik ilinniakkanik neqerooruteqartartunik sulegateqarlutik, ilinniakkat immikkoortuisa ilaannik nunani allani ingerlatsinissaq neqeroorutigisinnaavaat.

**§ 9.** Naalakkersuisut ilinniakkamik § 4, imm. 1 naapertorlugu neqerooruteqarnissamut akuersisummik tunuartitsisinnaapput, ima pisoqartillugu:

- 1) ilinniakkap neqeroorutigineqarnissaas pisariaqartinneqarunnaarpat,
- 2) ilinniakkamut pineqartumut tunngatillugu pitsaassusissanut piumasaqaatit qaqugukkulluunniit atuuttut ilinniakkap piviusungortissinnaajunnaarpagit,

- 3) ilinniakkamut qinnuteqartartut amerlassusaat imaluunniit ilinniagaqartut naammassisartut amerlassusaat nukissatigut sillimmatigisanut ilinniakkamut atorneqartartunut naleqqiullugit naapertuukkunnaarsimappata, imaluunniit
- 4) Naalakkersuisut suliffeqarnermi politikkikkut, aningaasaqarnikkut aamma inuiaqatigiinnermi isiginiagassanut naleqqiullugu ilinniakkamik neqerooruteqarnerup killilerneqarnissaa pisariaqartutut isigippassuk.

*Ilinniakkat imaat siunertaallu*

**§ 10.** Qaffasinnerusumik ilinniakkat, tak. §§ 11-16, ilinniakkaniq ingerlatsinerupput, European Credit Transfer System (ECTS) naapertorlugu aalajangersimasunik ECTS-pointillit.

*Imm. 2.* Piffissaq tamaat ilinniarnermik ingerlatsinerup ukiumi ataatsimi suliassartaasa assigaat 60 ECTS-point.

**§ 11.** Bacheloritut ilinniagaq tassaavoq ilisimatusarnermik tunngaveqartumik piffissaq tamaat ilinniagaq minnerpaamik 180 ECTS-pointinik naleqartoq, ilinniakkatut immikkoortutut, naammassisassatut ingerlanneqartoq. Ilinniartitaaneq ilinniartitaanerit pillugit ilinniakkat aaqqissugaaneri atorfinissutaasinnaasumik bacheloritut ilinniarner tut taaneqarsinnaavoq, ilinniartitaaneq atorfinissutaasinnaasumi aalajangersimasumi atorfininnissamik siunnerfeqarpat.

*Imm. 2.* Bacheloritut ilinniakkap siunertara:

- 1) ilinniartup ilinniartitsissummi ataatsimi amerlanerniluunniit ilisimatusarnikkut sammisassanik ilinniartinneqarnissaa, tamatumunnga ilanngullugit ilinniartitsissutip imaluunniit ilinniartitsissutit teoriivi periusalu, tassunakkut ilinniartoq ilinniakkamut tunngatillugu tamatigoortumik ilisimasaqalerlunilu piginnaaneqaleqqullugulu,
- 2) ilinniartup ilinniakkami ilisimasassanik aamma teoretiskimik periutsitigullu piginnaasanik pisinnaasani lu pissarsitinnissaa, tassunakkut ilinniartoq nammineerluni ilinniartitsissutip iluani imaluunniit ilinniartitsissutit iluanni apeqqutinik assiginngisitaartunik katitikanik suussusilersuisinnaaleqqullugu, oqaasertalersuisinnaaleqqullugu naammassinnissinnaaleqqullugulu, aamma
- 3) ilinniartup inuutissarsiutini suliassanik ingerlatsisinnaalernissaanut aamma kandidatitut ilinniakkami ilinnialernissaanut tunngavissinnissaa.

**§ 12.** Kandidatitut ilinniagaq tassaavoq ilisimatusarnermik tunngaveqartumik piffissaq tamaat ilinniagaq minnerpaamik 120 ECTS-pointinik naleqartoq, ilinniakkatut immikkoortutut, naammassisassatut ingerlanneqartoq.

*Imm. 2.* Kandidatitut ilinniakkap siunertara:

- 1) ilinniartup ilinniagassatigut ilisimasaanik pisinnaasaanillu annertusaanissaq aamma teoretiskimik periutsitigullu piginnaasanik pisinnaasani lu kiisalu bacheloritut ilinniakkap killifianut naleqqiullugu nammineersinnaanermik annertusaanissaq,
- 2) ilinniartup ilinniartitsissummi imaluunniit ilinniartitsissutini sammisassani periutsinilu immikkoortunik annertusanik atuineq aqqutigalugu ilisimasassatigut itisilerinissaa, tamatumunnga ilanngullugit ilisimatuutut suliaqarnermik periutsinillu sungiusarneq, ilinniartup inuutissarsiutini suliassanik immikkut

ilisimasaqarfunerusariaqartunik suliaqalernissaanik aamma ilisimatusarnikkut inerisaalluni sulanut peqataanissaanut piginnaanngortitsisumik, aamma

3) ilinniartup ingerlaqqilluni ilinniarnissaanut piginnaanngorsarnissaa, tamatumunnga ilanngullugu ph.d.-tut ilinniagaq.

**§ 13.** Ph.d.-mi ilinniagaq tassaavoq ilisimatutut ilinniarneq 180 ECTS-pointinik naleqartoq, nunat tamat akornanni angusassat nalingannut piginnaaneqalersitsisumik, ph.d.-tut ilinniartumik, namminersortut pisortallu ingerlatsiviini, ilisimatusarnermik tamatigoortumik ilisimasaqarnissamik piumasaqarfiusuni, nammineerluni ilisimatusarnermi, ineriertitsinermi aamma ilinniartitsinermi suliassanik ingerlatsisinaalersitsisoq. Ph.d.-tut ilinniarneq annerusumik ingerlanneqassaaq ilisimatusarnermik ingerlatsinikkut.

**§ 14.** Inuussutissarsiornermut akademimi ilinniagaq tassaavoq ilinniagaq ECTS-pointit 120-180-illu akornanni annertussusilik, ilinniakkatut immikkoortutut, naammassisassatut aaqqissuussaq, teorii sulinerlu paarlakaallugit ingerlanneqartoq.

*Imm. 2.* Inuussutissarsiornermut akademimi ilinniagaq piffissap ilaa ilinniakkatut 60 ECTS-pointinik naleqartutut teoretiskiinnaasutullu neqeroorutigineqarsinnaavoq, ilinniartoq minnerpaamik ukiuni 2-ni inuussutissarsiummik naapertuuttumik misilittagaqaqpata.

**§ 15.** Diplomitaarniarluni ilinniagaq tassaavoq, inuutissarsiummik aamma suliamik tunngavilimmik qaffasinnerusumik ilinniagaq 60 ECTS-pointinik naleqartoq.

**§ 16.** Masteritut ilinniagaq tassaavoq ilinniagaq ilisimatusarnermik tunngavilik 60 ECTS-pointinik naleqartoq, ilinniakkatut immikkoortutut, naammassisassatut ingerlanneqartoq.

*Imm. 2.* Masteritut ilinniakkap siunertaraa ilinniartup inuutissarsiuini sulinermik misilittagaqaareersup aamma ilinniakkamik tunuliaqtaqartup ingerlaqqiffusumik ilinniagaqarnissaa, immikkut ilinniakkap iluani, imaluunniit siammasinnerusumik siunnerfeqarluni ilikkagassap ataatsip iluani imaluunniit ilikkagassat arlaqartut iluanni.

#### *Ilinniakkat aaqqissugaaneri*

**§ 17.** Inatsisartut inatsisaata matuma sinaakkusiussaasa iluanni, ilinniarfit ilinniakkat pillugit malittarisassat erseqqinnerusut aalajangersassavaat, ilinniakkani tamani ilinniakkap aaqqissugaanerata allaaserineratigut, ph-d-tut ilinniagaq kisiat pinnagu. Ilinniakkat aaqqissugaaneri aamma kingusinnerusukkut taakkunani allannguutit annertunerusut Naalakkersuisuni tusarniaassutigineqassasut, taakku ilinniarfeqarfimmit aalajangersarneqarnissaat sioqqullugu.

*Imm. 2.* Ilinniakkat aaqqissugaaneri ilinniakkanut ataasiakkaanut naleqqussagaassapput, paasissutissanillu ilinniakkamut pingaaruteqartunik imaqqassallutik. Ilinniakkanut naleqquttuussusia aallaavigalugu ilinniakkat aaqqissugaanerisa makku imarissavaat:

- 1) Ilinniakkap taaguutaa kalaallisut, qallunaatut aamma tuluttut.
- 2) Ilinniakkap annertussusiligaanera ECTS-pointinik nalunaarlugu.

- 3) Ilinnialernissamut piumasaqaatit, qinnuteqartut ilinniakkami inissaqartinnejartunit amerlanerutillugit qinnuteqartunik tulleriaarinissamut malittarisassat, aamma qinnuteqarnissamut killiliussat.
- 4) Ilinniakkap ilinniagassatigut ilisarnaatai, makkunangna ersersitsisut:
- ilinniakkap siunertaa,
  - ilinniakkami ilinniartitsissutit, aamma
  - ilinniakkami ilikkagassatigut pissarsiassat.
- 5) Immikkoortukkaat pillugit malittarisassat, ilikkagassani immikkoortutut aamma ilikkagassat toqqagassat, tamatumunnga ilanngullugit:
- ilisimaligassatut, pisinnaaligassatut piginnaasaqarfingiligassatullu iluseqartillugit ilikkagassatigut pissarsiassat,
  - annertussusaa ECTS-pointitut nalunaarsorlugu,
  - ilinniartitseriaatsit suleriaatsillu, aamma
  - peqataanissamut piumasaqaatit.
- 6) Allattariarsorluni suliassat pillugit malittarisassat, tamatumunnga ilanngullugit bacheloritut suliassaq aamma speciali.
- 7) Soraarummeernerit pillugit malittarisassat.
- 8) Sungiusarluni sulinerit pillugit malittarisassat.
- 9) Nunani allani ilinniarnerit pillugit malittarisassat.
- 10) Ilinniartup piffissaq ilinniarfissaq sivisunerpaq, immikkut akuerineqarnissamut periarfissat ilinniarunnaarnerlu pillugit malittarisassat.
- 11) Ilinniariikkanik nuutsitsisinnaanermut malittarisassat.

*Imm. 3. Ilinniakkat aaqqissugaaneri ukiup ilinniarfiusup aallartinneraniit atortuulertassapput. Ilinniakkat aaqqissugaaneri, ilinniartunut ukiup ilinniarfiusup tulliani aallartittussanut atuuttussat, ilinniarfiup nittartagaani tamanut saqqummiunneqareersimassapput piffissaq qinnuteqarnissamut killiliussaq, § 19, imm. 1 aamma 2-mi aalajangersarneqartoq, nallertinnagu.*

*Imm. 4. Ilinniartut ilinniakkamik aallartitsereersut, ilinniakkap aaqqissugaanera ilinniarnerup aallartinnerani atuuttoq malissavaat. Ilinniakkap aaqqissugaanera allanngortinnejartillugu, ilinniartoq ilinniarnermi ingerlanerani ilinniakkap aaqqissugaaneranut nutaamut nooqqullugu peqquneqarsinnaanngilaq.*

*Imm. 5. Naalakkersuisut ilinniakkat aaqqissugaaneri pillugit malittarisassaliorssinnaapput, aamma piffissaq ilinniarfissaq sivisunerpaq pillugu malittarisassat.*

### *Pitsaassutsimik qularnaarineq*

**§ 18. Ingerlaqqiffiusumik ilinniakkat ataasiakkaat pitsaassutsimikkut qularnaarneqassapput, nunat tamat akornanni aalajangersakkat naapertorlugit.**

*Imm. 2. Naalakkersuisut pitsaassutsimik qularnaarineq pillugu malittarisassiuussapput.*

### **Kapitali 3**

*Qinnuteqarneq aamma ilinnialernissamut piumasaqaatit*

*Qinnuteqarneq*

**§ 19.** Ingerlaqqiffiusumik ilinniakkanut augustimi imaluunniit septemberimi aallartittussanut qinnuteqarnissamut killigititaq tassaavoq 1. marts, taamaattoq tak. imm. 2.

*Imm. 2.* Ilinniarfuit qaffasinnerusumik ilinniakkanut ataasiakkaanut tunngatillugu aalajangersinnaapput, ilinniartunik upernaakkut semesterimi aallartittussanik ilinnialertussatut akuersiniarlutik. Upernaakkut semesterimi ilinniarlutik aallartittussanut qinnuteqaateqartitsinermi ilinniartunngortitsinermilu periutsit, tamatumunnga ilanngullugit qinnuteqarnissamut akissuteqarnissamullu killiliussat, malittarisassat ilinniarfiup aalajangersagai nittartakkatigullu tamanut saqqummiussai malillugit pisassapput.

*Imm. 3.* Qinnuteqarnissamut killiliussaq, tak. imm. 1 aamma 2, ilinniakkat ataasiakkaat aaqqissugaameranni aamma ilinniarfiup nittartagaani ersarissumik takuneqarsinnaassaaq.

*Imm. 4.* Ilinniarfuit qinnuteqaatinik kingusinaartumik annguttoqartillugu, qinnuteqarnissamut killiliussaq saneqqussinnaavaat, tak. imm. 1 aamma 2, pissutsit immikkut ittu tamanna pisariaqalersippassuk.

**§ 20.** Qaffasinnerusumik ilinniakkamut ilinnialerumalluni qinnuteqarneq, periaassisat Naalakkersuisunit innersuunneqartut naapertorlugit pisassaaq, tak. imm. 2.

*Imm. 2.* Naalakkersuisut qinnuteqaateqarnermi periaassisat, ilusiliussassatut piumasaqaatit aamma teknikkikkut periarfissat innersuutissavaat tamannalu ilinniarnermik ilitsersuinerit pillugit nittartakkani naapertuuttuni saqqummiutissallugu.

*Imm. 3.* Imm. 1 naapertorlugu qinnuteqaatinut ilanngunneqassapput ilinniagassatut qinnutigisami ilinnialernissamut tunngavigisanut upternarsaatit. § 19, imm. 1 aamma 2-mi qinnuteqarnissamut killiliussat naaneranni, ilinnialernissamut tunngavigisat upternarsataat pissarsiarineqarsimangippata, upternarsaatit malinnaatillugit nassiunneqassapput ilinniarfiup tamatumunnga killiliussaata iluani.

*Imm. 4.* Soraarummeersimanermut upternarsaatit il.il., ilinnialerumalluni qinnuteqarnermi nassiunneqartut kalaallisut, qallunaatut, Nunat Avannarliit allat oqaasii atorlugit imaluunniit tuluttut allagaanngitsut, oqaatsit pineqartut arlaannut ataatsimut nutserneqarsimanaissaat pillugu ilinniarfik malittarisassanik aalajangersaasinnaavoq.

*Imm. 5.* Qinnuteqaatit, tamatumunnga ilanngullugit qaffasinnerusumik ilinniakkamut qinnuteqaatit ilinnialernissarlu pillugu attaveqaqtiginnerit, tamakkiisumik ilaannakortumilluunniit digitaliusumik pisassanersut, tamatumunnga ilanngullugu digitaliusumik aaqqissuussinerit aalajangersimasut pinngitsoorani atorneqarnissaat qularnaatsumillu kinaassutsimik ilisarsisoqarsinnaanissaa pillugit Naalakkersuisut malittarisassanik aalajangersaasinnaapput.

#### *Ilinnialernissamut piumasaqaatit*

**§ 21.** Bacheloritut ilinniakkami ilinnialernissamut piumasaavoq ilinniarnertuunngorniarfimmi ilinniarsimaneq, tamatumunnga ilanngullugit immikkut aaqqissuussamik ilinniarnertuunngorniarnermik ingerlatsineq, ilinnialernissamut immikkut piumasaqaatinik naammassinnineq, tak. § 22, kiisalu karakteeritigut piumasaqaataajunnartunik piviusunngortitsisinnaaneq, tak. § 23.

*Imm. 2.* Aammattaaq ilinnialernissamut piumasaqaataasinnaavoq, malittarisassat ilinniarfiup aalajangersagai naapertorlugit qinnuteqartup ilinnialernissamut misilitsinnermi angusisimanissa.

**§ 22.** Ilinnialernissamut immikkut piumasaqaatit tassaapput ilinniarnertuungorniarfimmi ilinniartitsissutit aalajangersimasut killiffik A-, B-, imaluunniit C-miittut, tak. ilinniarnertuungorniartarneq pillugu lnatsisartut inatsisaat.

*Imm. 2.* Ilinnartitsissutip aalajangersimasumik qaffasissuseqarnissa piumasaappat, tak. imm. 1, qinnuteqartup ilinniartitsissutini angusinissamut killigititaq, killiffimmi tassani qaffasinnerusumiluunniit angusimassavaa, ilinniarnertuungorniarfimmi pineqartumi karakteeriliisarneq pillugu malittarisassat naapertorlugit. Ilinnartitsissummi karakteerit arlallit ilaappata, karakteeritigut piumasaqaat naammassineqarsimassaaq agguaqatigiissitsinermi pingaartitaq anguneqarsimappat. Karakteeritigut piumasaqaat naammassineqarsinnaanngilaq qummut akunnaalliliinikkut.

**§ 23.** Karakteeritigut piumasaqaat ima paasineqassaaq, ilinnialissutaasinjaasumik soraarummeerneq naammassineqarsimassasoq, ilinniarnertuungorniarfimmi pineqartumi karakteeriliisarneq pillugu malittarisassat naapertorlugit, agguaqatigiissitsinermi karakteeri aalajangersimasoq minnerpaatut karakteereralugu, imaluunniit ilinniartitsissutit ataasiakkaat angusiffiusimassasut karakteerip minnerpaaffissa aalajangersimasoq karakteereralugu. Piumasaqaat naammassineqarsinnaanngilaq qummut akunnaalliliinikkut.

**§ 24.** Iliniakkanut ataasiakkaanut ilinnialernissamut piumasaqaatit aalajangersimasut aamma karakteeritigut piumasaqaatit, tak. §§ 22 aamma 23 ilinniarfinnit ataasiakkaanit aalajangersarneqassapput.

*Imm. 2.* Ilinniarfifit aalajangersinnaavaat, misilitsinnermi ilinniarfirmit immikkut aaqqissuussaasumi angusaq, aammalu assingusunik piginnaaneqarnermik upternarsaasoq, qinnuteqartunut § 23 naapertorlugu karakteeritigut piumasaqaammik naammassinninngitsunut, karakteeritigut piumasaqaatinik naammassinninnertut naleqartinneqarsinnaasoq.

*Imm. 3.* Ilinniarfik § 23-mi karakteeritigut piumasaqaammik saneqqutsisinnaavoq, pissutsit immikkut ittut tamanna pisariaqlersippassuk.

**§ 25.** Bacheloritut ilinniagaqarumallutik qinnuteqartut, ilinnialernissamut piumasaqaatitut aalajangiunneqartunit, tak. § 21, allaanerusumik tunngaveqarlutik qinnuteqarnissaat ilinniarfiup akuerisinnaavaa, qinnuteqartoq piumasaqaatinut sanilliunneqarsinnaasunik ilisimasassatigut piginnaaneqarpat, ilinniarfiullu nalilerpagu qinnuteqartup ilinniagaq naammassisinnaassagaa.

*Imm. 2.* Ilinniarfifit imm. 1 naapertorlugu akuersinissaminut piumasarisinnaavaa, qinnuteqartup kingusinnerpaamik ilinniernerup aallartinnerani naammattusaammik misilitsinnermi anguseeqqaarnissaa, piginnaanerit pisariaqartut upternarsarumallugit.

**§ 26.** Kandidatitut ilinnialernissamut piumasaavoq, naapertuuttumik bacheloritut ilinniagaqarnissaq, tak. § 11, imm. 1, imaluunniit naapertuuttumik allamik, assingusumik qaffasissusilimmik Kalaallit Nunaanni, Danmarkimi nunamiluunniit allami ilinniagaqarsimanissaq.

*Imm. 2.* Ilinniarfifit kandidatitut ilinniakkani ataasiakkaani ilinnialernissamut piumasaqaatit aalajangersassavai.

*Imm. 3.* Kandidatitut ilinniagaqarumallutik qinnuteqartut, imm. 1-im i linnialernissamut piumasaqaatit aalajangiunneqartunit allaanerusumik tunngaveqarlutik ilinnialernissaat ilinniarfiup akuerisinnaavaa,

qinnuteqartoq piumasaqaatinut sanilliunneqarsinnaasunik ilisimasassatigut piginnaaneqarpat, ilinniarfiullu nalilerpagu qinnuteqartup ilinniagaq naammassisinnaassagaa. Ilinniarfiup aalajangersinnaavaa, qinnuteqartup kingusinnerpaamik ilinniarnerup aallartinnerani naammattusaammik misilitsinnermi anguseqqaarnissaa, imaluunniit ilinniartitsissutinik naammattusaataasunik ingerlatseqqaarnissaa.

**§ 27.** Ph.d.-tut ilinnialernissamut piumasaavoq qinnuteqartup, ilinniakkamik qaffasissutsimigt kandidatitut ilinniakkamut nallersunneqarsinnaasumik ilinniagaqarsimanissaa, tak. § 12, imm. 1.

*Imm. 2.* Ilinniarfiup aalajangersinnaavaa ph.d.-tut ilinniarnermk ingerlatsineq kandidatitut ilinniarnerup ingerlanneranut atasumik aallartinneqarsinnaasoq, kisianni qularnaarneqassaaq ilinniarnerup tamarmiusup, ilinniakkat marluk uiuleriisillugit ingerlanneqarnerat, annertoqatigalugulu qaffaseqatigigaa, tak. §§ 12 aamma 13.

*Imm. 3.* Ilinniarfiup aalajangissavaa kikkut ph.d.-tut ilinnialissanersut. Ilinniarfiup nittartagaani ersissaaq, ilinnialernissamik akuersinermut piumasaqaatit suut tunngaviussanersut.

**§ 28.** Inuussutissarsiornermut akademimi ilinniakkami ilinnialernissamut piumasaavoq ilinniarnertuunngorniarfimmik ilinniarnermk naammassisimanissaq, tamatumunnga ilanngullugit immikkut aaqqissuussamik ilinniarnertuunngorniarnermk ingerlatsineq imaluunniit inuutissarsiummik ilinniagaqarneq, tak. inuussutissarsiutinik ilinniartitsinerit aamma inuussutissarsiutinik ilinniartitsinerit iluanni pikkorissarttsisarnerit pillugit Inatsisartut inatsisaat. Ilinniarfiup piumasaqaatigisinnaavaa, lærlingitut isumaqtigiiissuteqarsimanissaq imaluunniit suliffeqarfimmik sungiusarluni sulinissamik isumaqtigiiissuteqarsimanissaq.

*Imm. 2.* Ilinniarfiup imm. 1-im i linnialernissamut piumasaqaatitut aalajangiunneqartunit allaanerusumik tunngaveqarlutik qinnuteqartut ilinnialernissaat akuerisinnaavaa, erseqqissumik naliliineq tunngavigalugu nalilerneqarpat, qinnuteqartoq ilinniakkap naammassinissaanut ilinniakkamigut piginnaasaqartoq.

Ilinniarfiup piumasarisinnaavai misilitsinnernik ingerlatsinissat, inuit ataasiakkaarlugit oqaloqatigineqarnissat imaluunniit qinnuteqaammik tunngavilersukkamik nassiussisoqarnissaa.

**§ 29.** Diplomitaarniarluni ilinnialernissamut piumasaavoq, ilinniakkamik ilinnialissutaasinnaasumik naapertuutumik ilinniagaqarsimanissaq, minnerpaamik inuussutissarsiornermut akademimi ilinniakkap naligisaanik, tak. § 14, kiisalu diplomitaarniarluni ilinniakkamut tunngatillugu aalajangersarneqarsinnaasunik immikkut ilinnialernissamut piumasaqaataasinnaasunik naammassinninnissaq.

*Imm. 2.* Ilinniakkap ilinnialissutaasinnaasup naammassinerata kingorna, qinnuteqartut inuutissarsiummi sulinermik minnerpaamik ukiuni marlunni naapertuutumik misilittagaqassapput. Suut inuutissarsiummi sulinermik naapertuutumik misilittagaanerannik naliliineq, ilinniarfinnit isumagineqassaaq.

**§ 30.** Masteritut ilinnialernissamut piumasaavoq qinnuteqartup ilinniakkamik ilinnialissutaasinnaasumik naapertuutumik ilinniagaqarsimanissaa, minnerpaamik ima killifflimmik:

- 1) bacheloritut ilinniagaq, tak. § 11, imm. 1,
- 2) diplomitaarniarluni ilinniagaq, tak. § 15, imaluunniit
- 3) nunani allani ilinniagaq taakkua naleqqatigisaat, tak. nr. 1 aamma 2.

*Imm. 2.* Qinnuteqartut inuutissarsiummi sulinermik minnerpaamik ukiuni marlunni naapertuuttumik misilittagaqassapput. Suut inuutissarsiummi sulinermik naapertuuttumik misilittagaanerannik naliliineq, ilinniarfinnit isumagineqassaaq.

*Imm. 3.* Ilinniarfiup qinnuteqartut imm. 1-imik piumasaqaatinik naammassinnngitsut, kisiannili erseqqissumik nalileereernerup kingorna taakkununnga ilinniakkatigut nallersuussinnaasumik ilinniagaqartutut nalilerneqartut, ilinnialertussatut akuerisinnaavai. Ilinniarfiup aalajangersinnaavaa, qinnuteqartup kingusinnerpaamik ilinniarnerup aallartinnerani naammattusaammik misilitsinnermi anguseeqqaarnissaa.

**§ 31.** Ilinnialernissamut piumasaqaatinik sakkortunerulersitsineq, tak. §§ 21 aamma 26-30, atuutsitsilernissaq minnerpaamik ukiunik 2-nik siqqullugu nalunaarutigineqartassaaq.

*Imm. 2.* Nalunaaruteqarluni ilisimatitsineq pissaaq ilinniarfiup pineqartup nittartagaani.

#### Kapitali 4

##### *Ilinnialertussanik killilersuineq aamma ilinniartunngortitsinermi inissaqartitsineq*

**§ 32.** Ilinniarfiit namminneq aningaasaqarnikkut sinaakkusiussat iluanni aalajangissavaat, ilinniartut qassit iliniakkani ataasiakkaani ilinniartunngortinniarnerlugit, taamaattoq tak. imm. 2 aamma 5 aamma § 9, nr. 3. Taamaattoq ilinniartut piffissaq tamaat ilinniakkami allami ilinnialersussatut akuerisaasimasut ilinniartussatut akuerineqarsinnaanngillat, taamaaliornissamut immikkut illuinnartunik peqqutissaqartinnagu.

*Imm. 2.* Ilinniartunngortitsinermi inissaqartitsinerup aalajangiunnerani, ilinniarfiit qularnaassavaat, isumannaatsumik piginnaaneqarluartunillu ilinniartitsisoqarluni illutatigullu naammattunik inissaqartitsilluni ilinniartitsisoqarsinnaanissaa. Ilutigisaanik ilinniarfiit isiginiaassavaat, ilinniartussatut akuerineqartut amerlassusaasa inuiaqatigiinni taamatut ilinniarsimasunik pisariaqartitsinernut naapertuuttuuneri.

*Imm. 3.* Ilinniarfiit ilinniartunngortitsinermi inissaqartitsinerup aalajangiunneranni, utaqqisut allassimaffianni tulleriaakkami utaqqisutut inissat qassiunissaat aalajangiussinnaavaat.

*Imm. 4.* Ilinniarfiit ilinniakkamik neqerooruteqarnissaq pinngitsoorsinnaavaat, qinnuteqartut amerlassusaasa taamaaliornissaq pissusissamisoortippassuk.

*Imm. 5.* Naalakkersuisut iliniakkani ataasiakkaani ukiumut ilinniartunngortitsinermi inissaqartitsinerup amerlanerpaaffissai aamma ikinnerpaaffissai aalajangersarsinnaavaat.

**§ 33.** Ilinniakkanut ataasiakkaanut qinnuteqartut, ilinniartunut inissanit amerlaneruppata, ilinniartunngortitsisoqassaaq tulleriaarinermi malittarisassat ilinniakkat ataasiakkaat aaqqissugaaneranni aalajangersarneqartut naapertorlugit.

*Imm. 2.* Qinnuteqartut utaqqisut allassimaffiannut ilanngunneqarsinnaapput, qinnuteqartut piginnaanillit ilinniartunut inissanit amerlaneruppata, tak. § 32, imm. 3.

**§ 34.** Ilinniartut ilinniakkami qinnuteqaatigisaminni ilinnialersinnaasut, piffissaliussap Naalakkersuisunit tamanut nalunaarutigineqartup iluani, ilinniarfiit nalunaarfigissavaat ilinniakkami inissamik neqeroorfigalugit.

*Imm. 2.* Qinnuteqartut ilinniakkami qinnuteqaatigisaminni ilinnialernissaminnut akuerisaangitsut, imm. 1-imi piffissaliussap iluani tamanna pillugu ilinniarfinnit nalunaarfigineqassapput.

*Imm. 3.* Qinnuteqartut imm. 2-mi pineqartut, tulleriaarilluni utaqqisut allassimaffiannut ilanngunneqarsinnaasut, tak. § 33, imm. 2, tamanna pillugu, kiisalu utaqqisut allassimaffianni sumi inisisimanerminnik nalunaarfigineqassapput.

*Imm. 4.* Ilinniakkami inissaq neqeroorutigineqartoq, tak. imm. 1 aamma 3, atorunnaassaaq, qinnuteqartup ilinniakkami inissamik neqeroorutigineqartumik akuersinini upternarsaasinngippagu, piffissaliussap neqerooruteqarnerup ilinniarfimmit nalunaarutiginerani aalajangerneqartup iluani.

**§ 35.** Naalakkersuisut qaffasinnerusumik ilinniakkani ilinnialersinnaaneq ilinniartutullu akuerisaaneq pillugit malittarisassanik erseqqinnerusunik aalajangersaasinnaapput.

## **Kapitali 5**

*Aalajangersakkat allat*

### *Ilinniagaqarluni Kalaallit Nunaata avataaniinneq*

**§ 36.** Bacheloritut ilinniartut, tak. § 12, imm. 1, ilinniarnerup ingerlanerani ilinniarnerminnut atatillugu Kalaallit Nunaata avataani ilinniassapput, taamaattoq tak. imm. 2 aamma § 41, imm. 1. Ilinniarnermut atatillugu nunami allamiinneq ima aaqqissuunneqarsinnaavoq:

- 1) semesteritut ilivitsutut,
- 2) ilinniartitsissutini ataasiakkaani imaluunniit
- 3) piffissaq sungiusarluni suliffik ataaseq amerlanerilluunniit.

*Imm. 2.* Imm. 1-imi, oqaaseqatigiinni siullerni piumasaqaataasoq kandidatinngorniarluni ilinniartumut atuutissanngilaq bacheloritut ilinniartitaanermini pinngitsoorani nunap avataani ilinniagaqarsimanissamik kandidatitut ilinniarnissamik piumasaqaateqarfiusumi.

*Imm. 3.* Ilinniakkamut atatillugu nunami allamiinneq pillugu malittarisassat ilinniakkap pineqartup aaqqissugaanerani aalajangersarneqassapput.

*Imm. 4.* Inatsisartut inatsisaat manna naapertorlugu qaffasinnerusumik ilinniakkanut allanut, ilinniarfit ilinniarnermut atatillugu pinngitsoorani nunami allamiittarneq, tak. imm. 1, pillugu malittarisassanik aalajangersaasinnaapput, taamaattoq tak. § 41, imm. 2. Malittarisassat ilinniakkap pineqartup aaqqissugaanerani ersissapput.

*Imm. 5.* Ilinniarfit qinnuteqareernermikkut imm. 1-imik aamma malittarisassanik imm. 4 naapertorlugu aalajangersarneqartunik saneqqutsisinnaapput, pissutsit immikkut ittut tamanna pisariaqartippassuk, tamatumunnga ilanngullugit ilaqtariinni pissutsit, peqqissutsimut tunngasumik pissutsit, ilinniarnermut tunngatillugu pissutsit, ilinniagaqarluni nunanit misilittagaqrneq assigisaaluunniit.

*Imm. 6.* Ilinniartut imm. 5 naapertorlugu immikkut akuerineqartut, ilinniarnerup ingerlanissaanik allamik neqeroorfigineqassapput.

### *Ilinniartitsisut piginnaasaqarnissaannik piumasaqaatit*

**§ 37.** Naalakkersuisut Inatsisartut inatsisaat manna naapertorlugu qaffasinnerusumik ilinniakkani ilinniartitsisut piginnaasaqarnissaannik piumasaqaatit pillugit malittarisassat aalajangersassavaat.

*Ilitsersuisarneq*

**§ 38.** Ilinniarfuit ilinniartut ilinniarnermik ingerlatsinerini ilinniakkamut kingornagullu suliffissanut periarfissaasunut tunngatillugu ilitsersorneqarnissamik neqeroorfingissavaat.

*Imm. 2.* Ilinniarfuit ilinniartut ilinniakkaminni piffissaliussaasumut sanilliullugu kinguartooqqasut immikkut ilitsersortassavaat, ilinniagaqartup ilinniakkaminik naammassinnissinnaanissaminut periarfissaasa tapersersornissaat siunertaralugu.

*Imm. 3.* Naalakkersuisut ilitsersuisarneq pillugu malittarisassanik annertunerusunik aalajangersaasinnaapput.

*Maalaaruteqartarneq*

**§ 39.** Ilinniarfuit aalajangiineri, ilinniartut imaluunniit qinnuteqartut inatsisitigut inissismanerinut tunngasut, Naalakkersuisunut saqqummiunneqarsinnaapput. Maalaaruteqarneq pissaaq ullormit aalajangiinerup maalaaruteqartumut nalunaarutigineraniit sapaatip-akunneri 4 qaangiutsinnagit.

*Imm. 2.* Maalaaruteqarneq kinguartitsinermik sunniuteqarsinnaanngilaq, taamaattoq tak. imm. 3.

*Imm. 3.* Naalakkersuisut maalaaruteqarnissamut periarfissat maalaarutillu suliarineqartarnerat aamma maalaarutit aalajangersimasut kinguartitsinermik sunniuteqarsinnaanerat pillugit malittarisassanik aalajangersaasinnaapput.

*Atortuulersitsineq, atorunnaarsitsinermut ikaarsaariarnermullu aalajangersakkat*

**§ 40.** Inatsisartut inatsisaat atortuulerpoq 1. august 2019.

*Imm. 2.* Ilutigisaanik atorunnaarsinneqarpoq Isumaginninnermi perorsaasussanik ilinniartitsineq pillugu Inatsisartut peqqussutaat nr. 2, 20. maj 1998-imeersoq aamma najoqqtassat taassuma nassatarisaanik atuutsinneqartut.

**§ 41.** § 36, imm. 1 naapertorlugu nunami allamiinneq pillugu malittarisassat atuutinngillat ilinniartunut Inatsisartut inatsisaata atuutilernerata nalaani bacheloritut ilinniakkamik aallartitsisimasunut imaluunniit 1. august 2021 sioqquillugu bacheloritut ilinniakkamik aallartitsisunut.

*Imm. 2.* Qaffasinnerusumik ilinniakkutan allanut tunngatillugu pinngitsoorani ilinniarluni nunami allamiinnissaq pillugu malittarisassat, tak. § 36, imm. 4, taamaallaat atuutissapput ilinniartunut, ilinniakkani 1. august 2021-mi kingusinnerusukkulluunniit aallartittuni ilinniartuuusunut.

Kim Kielsen

**Namminersorlutik Oqartussat**

Imaneq 4  
3900 Nuuk  
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut